

Lambakan warga asing

'Kehadiran jejas sosial, ekonomi di bandar raya'

Kementerian Wilayah Persekutuan akan laksana tindakan bersepadu atasi banjir PATI

Oleh Nor Azizah Mokhtar
bhnews@bh.com.my

Kuala Lumpur: Kementerian Wilayah Persekutuan akan memberi perhatian khusus untuk menyelesaikan lambakan pendatang asing tanpa izin (PATI) di sekitar ibu negara.

Menteri di Jabatan Perdana Menteri (Wilayah Persekutuan), Dr Zaliha Mustafa, berkata pihaknya tidak menghukum warga asing secara keseluruhan kerana ada yang masuk ke negara ini secara sah.

"Yang masuk ke Malaysia dengan dokumen sah, itu tidak menjadi masalah. Namun, lambakan warga asing yang berada di Malaysia tanpa dokumen sah atau PATI ini perlu diberi perhatian serius.

"Kehadiran mereka pastinya sedikit sebanyak menjejaskan ekonomi dan sosial di Wilayah Persekutuan," katanya kepada BH.

Dr Zaliha berkata, sebagai contoh, dari sudut ekonomi, golongan PATI ada berkemungkinan besar terbabit dengan akti-

viti pasaran gelap.

"Memandangkan mereka tidak dibenarkan bekerja di pasaran terbuka, mereka akan bekerja di pasaran gelap. Hal ini boleh menyebabkan sistem ekonomi pasaran gelap lebih berkembang.

"Dari sudut sosial pula, ada kemungkinan mereka boleh mencetuskan isu keselamatan seperti peningkatan jenayah dan masalah penempatan haram," katanya.

Selain itu, katanya kewujudan banyak koloni warga asing, terutama dalam kalangan PATI di beberapa lokasi di ibu kota juga akan memberi ancaman kepada penduduk setempat.

"Ada kemungkinan juga akan berlaku penghijrahan warga tempatan yang sebelum ini berada di kota Kuala Lumpur ke kawasan pinggir bandar.

"Perkara itu mungkin akibat lambakan warga asing yang berkemungkinan mengancam keselamatan dan ketenteraman penduduk setempat," katanya.

Bagi menangani banjir warga asing di kawasan penempatan penduduk, beliau berkata, tindakan bersepadu membabitkan jabatan dan agensi berkaitan akan dilaksanakan.

"Sudah pasti tindakan bersepadu dari semua kementerian dan agensi yang terlibat seperti

Polis Diraja Malaysia (PDRM), Jabatan Imigresen dan pihak berkuasa tempatan (PBT) di kawasan terbabit perlu dilaksanakan.

"Selain itu, kerjasama pemilik unit kediaman juga amat penting supaya tidak menyewakan unit kediaman kepada warga asing yang tidak mempunyai taraf penempatan yang sah di Malaysia," katanya.

Isu membimbangkan

Mengulas lanjut, Dr Zaliha berkata pihaknya memandangi isu lambakan warga asing dan PATI ini sebagai suatu isu yang membimbangkan.

"Senario ini boleh menimbulkan pelbagai isu lain seperti gangguan ekonomi, keselamatan, sosial dan juga tekanan lain.

"Dengan jumlah yang besar, mereka boleh mencetuskan ketidakseimbangan dalam pasaran buruh dan ada kemungkinan memberi impak kepada peningkatan kadar jenayah," katanya.

Selain itu, katanya isu etnik dan budaya juga boleh muncul sehingga menyebabkan ketegangan antara komuniti tempatan dengan mereka.

"Oleh itu, penting untuk kita ambil tindakan yang proaktif dalam mengendalikan dan menyelesaikan isu ini bagi memastikan keselamatan dan kesejahteraan warga Wilayah Persekutuan khususnya dijaga dengan baik," katanya.

Menurutnya, isu lambakan warga asing ini adalah isu legasi yang diperlu dihadapi pihaknya

“Memandangkan mereka tidak dibenarkan bekerja di pasaran terbuka, mereka akan bekerja di pasaran gelap. Hal ini boleh menyebabkan sistem ekonomi pasaran gelap lebih berkembang”



Dr Zaliha Mustafa,
Menteri
di Jabatan
Perdana
Menteri
(Wilayah
Persekutuan)

dan akan cuba ditangani sebaik mungkin menerusi tindakan komprehensif termasuk peniaga haram warga asing.

"Saya sudah mengarahkan Dewan Bandaraya Kuala Lumpur (DBKL) untuk memantau setiap peniaga di Wilayah Persekutuan Kuala Lumpur secara berkala.

"Terutama kepada peniaga yang menyalahgunakan lesen perniagaan mereka kepada warga asing tanpa dokumen yang sah serta menggajikan pekerja daripada kalangan PATI.

"Seperti mana pengumuman yang saya buat sebelum ini, mana-mana pemilik lesen yang menyewakan lesen perniagaan mereka kepada PATI atau menggaji pekerja asing yang tidak berlesen, tiada kompromi untuk mereka.

"Lesen perniagaan mereka akan ditarik balik atau digantung dengan serta-merta," katanya.

Mengenai isu peniaga tempatan mengalibabkan lesen perniagaan, Dr Zaliha berkata, tindakan penguatkuasaan akan diperketatkan dari semasa ke semasa bagi membanteras isu itu.



Kewujudan banyak koloni warga asing di beberapa lokasi di ibu kota akan memberi ancaman kepada penduduk setempat. (Foto Saifullizan Tamadi/BH)